

25 MAR 1996

LEBIH 50,000 ANGGOTA UMNO DIJANGKA HADIR HIMPUNAN UMNO

KUALA LUMPUR, 25 Mac (Bernama) -- Lebih 50,000 orang khususnya anggota UMNO dari Semenanjung dan Sabah dijangka menyertai himpunan perdana di Dataran Merdeka di sini pada malam 10 Mei ini bagi perayaan memperingati tarikh kelahiran ke-50 UMNO.

Pengerusi Jawatankuasa Induk Majlis Tahlil dan Himpunan Perdana Ulangtahun ke-50 UMNO, Tan Sri Muhammad Haji Muhamad Taib hari ini berkata 65 anggota daripada setiap bahagian UMNO akan menghadiri majlis itu yang akan turut dihadiri Presiden UMNO dan Perdana Menteri Datuk Seri Dr Mahathir Mohamad serta pemimpin parti yang lain.

Bagaimanapun, katanya, lebih ramai anggota UMNO dari Selangor dan Kuala Lumpur dikehendaki menghadirinya bagi memeriahkan lagi majlis itu.

Menurutnya, sempena majlis itu, Keretapi Tanah Melayu (KTM) Berhad dan Penerbangan Malaysia bersetuju mengadakan tambang konsesi untuk anggota-anggota UMNO yang akan menghadiri majlis itu.

Beliau juga berkata majlis pada malam itu didahului dengan ketibaan Obor 50 tahun UMNO diikuti dengan upacara menaikkan bendera UMNO dan persembahaan koir sebelum Dr Mahathir menyampaikan amanatnya mengenai perjuangan masa depan parti.

Muhammad berkata sebelum majlis perhimpunan itu, satu majlis tahlil dan bacaan surah Yasin akan diadakan di Masjid Negara. -- BERNAMA

ARA AKD